

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԸՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ը. Տարի, Թիւ 323, Ուրբաթ, 04 ՄԱՐՏ, 2016

ՀԱՄԱՅՆՔԱՅԻՆ

Ն. Ս. Օ. Տ. Տ. ԱՐԱՄ Ա. ԿԱԹՈՂԻԿՈՍ »«Ր ԿԸ ՀՌԶԱԿԷ «ՇԱՌԱՅՈՒԹԵԱՆ ՏԱՐԻ»

3 Յունուար 2016-ի առաւօտուն, Ս. եւ Անմահ Պատարագի ընթացքին, ընթերցուեցաւ Ն.Ս.Օ.Տ.Տ. Արամ Ա. Կաթողիկոսի 2016 թուականը «Շառայութեան Տարի» հռչակող պատգամը: Ամբողջ տարուան ընթացքին Հայրապետական այս պատգամը ուղեցոյց պիտի ծառայէ լուսարձակի տակ առնելու ծառայութեան կարեւորութիւնը մեր եկեղեցւոյ ու ազգին կեանքէն ներս: Կիլիկիոյ Կաթողիկոսութեան թեմերն ու ազգային կառոյցները, անսալով Նորին Սրբութեան կոչին վերաբժեւորումի պիտի ենթարկեն եւ յատուկ ծրագիրներ մշակեն առաւել եւս արդիւնաբեր ծառայութիւն մատուցելու մեր եկեղեցւոյ, ազգին ու հայրենիքին:

Արամ Ա. Կաթողիկոս «Շառայութեան Տարի»-ի այս պատգամին մէջ կ'անդրադառնայ ծառայութեան էական կարեւորութեան մեր եկեղեցւոյ պայծառութեան, ազգին բարգաւաճումին, հայրենիքի կերտումին եւ իւրաքանչիւր հայ անհատի բարօրութեան համար:

**Մեծի Տանն Կիլիկիոյ Կաթողիկոսութեան
Թեմակալ Առաջնորդներուն,
հոգեւոր դասուն,
Ազգային Իշխանութեանց, եւ
մեր ժողովուրդի զաւակներուն**



Աստուծոյ Որդւոյն մարդեղութեան եւ Նոր Տարուան խորհուրդով ու պատգամով օծուն այս օրերուն, Մեծի Տանն Կիլիկիոյ Կաթողիկոսութեան Անթիլիասի Մայրավանքէն հայրապետական օրհնութեամբ ու քրիստոնէական ջերմ սիրով կ'ողջունենք ձեզ: Կ'աղօթենք առ Ամենաբարին Աստուած, որ մեր ժողովուրդի սիրելի զաւակներուն, մեր ընտանիքներուն ու մեր Մեծ Ընտանիքին՝ ազգին կեանքը լեցնէ երկնային առատ բարիքներով ու նորանոր յաջողութիւններով:

Տարիներ առաջ Մեր նախաձեռնած գեղեցիկ աւանդութիւնը շարունակելով, 2015 տարին Հայրապետական Կոնդակով հռչակեցինք ՊԱՀԱՆՋԱՏԻՐՈՒԹԵԱՆ ՏԱՐԻ: Անցնող տարուան ընթացքին, թէ՛ գաղութային եւ թէ՛ համահայկական մակարդակներու վրայ, այլազան ու բազմազան նախաձեռնութիւններու ու ձեռնարկներու ճամբով՝ միշտ միասնական ոգիով, ամուր վճռակամութեամբ ու յառաջատեսիլ մօտեցումով, նշուեցաւ հայոց ցեղասպանութեան 100-ամեակը: Արդարեւ, Մեր որդեգրած բնաբանը՝ «Յիշել, Յիշեցնել ու Պահանջել» դարձաւ հայոց ցեղասպանութեան 100-ամեակի արժեւորման մղիչ ուժը, անոր խորք, ընթացք ու նպատակ տուող ուղեգիծը:

Հայոց ցեղասպանության 100-ամեակի նշման ծիրեն ներս Մեծի Տանն Կիլիկիոյ Կաթողիկոսութիւնը շեշտը դրաւ պահանջատիրութեան վրայ: Մեր կազմակերպած ձեռնարկներուն, կատարած աշխատանքներուն, մշակած ծրագիրներուն, օտար եկեղեցական, քաղաքական ու պետական պատասխանատուներուն հետ ունեցած հանդիպումներուն, հայ թէ օտար շրջանակներէն ներս Մեր ունեցած հրապարակային ելոյթներուն ու հրատարակութիւններու ճամբով յատուկ կարեւորութեամբ ընդգծեցինք մեր ժողովուրդի արդար դատը իրաւական մարզ փոխադրելու անյետաձգելի հրամայականը: Եւ աւելի՛ն, որպէս գործնական արտայայտութիւն Մեր կատարած կոչին, պատմութեան մէջ առաջին անգամ ըլլալով մեր Սուրբ Աթոռը իրաւական քայլի դիմեց Թուրքիոյ Սահմանադրական Դատարանին մօտ, պահանջելով Սիսի իր դարաւոր Կաթողիկոսարանը:

Արդարեւ, իւրաքանչիւր հայ պահանջատէր է, մեր ողջ ազգը պահանջատէր է այնքան ատեն, որ հայոց ցեղասպանութիւնը չէ ճանչցուած ցեղասպանին կողմէ եւ մեր ժողովուրդը չէ վերատիրացած իր բռնաբարուած իրաւունքներուն: Մեր պահանջատիրական պայքարը տարբեր մօտեցումներով ու շեշտաւորումներով պէտք է շարունակուի 2015-էն անդին:

Արդ, պահանջատիրական ոգիով թրծուած, եւ մեր եկեղեցւոյ, ժողովուրդին ու հայրենիքին կեանքը աւելի ծաղկեցնելու ու հզօրացնելու յանձնառութեամբ շաղախուած, 2016 տարին կը հռչակենք՝

«ԾԱՌԱՅՈՒԹԵԱՆ ՏԱՐԻ»

Ծառայութիւնը մեր առօրեայ խօսակցութեան մէջ յաճախակիօրէն գործածուող սովորական բառ դարձած է, ինչպէս նաեւ՝ մեր կեանքին մէջ յաճախ պարզուող բնական երեւոյթ մը: Սակայն, խորունկ նշանակութիւն ունի ծառայութիւնը: Ան մարդկային կեանքին ամենէն բարձր արժէքներէն ու արժանիքներէն մէկն է: Ծառայութիւնը իր խոր էութեամբ հաւատքի ու նուիրումի շօշափելի արտայայտութիւն է, Աստուծոյ ու մեր նմանին հանդէպ ունեցած հաւատարմութեան ու սիրոյ գործնականացումն է: Ծառայութիւնը ճիշդ ու համապարփակ կերպով ըմբռնելու համար անհրաժեշտ է առաջին հերթին դառնալ Աստուածաշունչին, որպէս աղբիւրը աստուածային յայտնութեան եւ հիմքը՝ քրիստոնէական հաւատքին ու կեանքին:

Ա.

Ծառայութիւնը Աստուածաշունչին մէջ

Ի՞նչ կ'ըսէ Աստուածաշունչը ծառայութեան մասին: Նախ ընդհանուր գիծերով ակնարկ մը նետենք Հին Կտակարանին վրայ:

Իրենց կեանքը Աստուծոյ ու ժողովուրդի ծառայութեան նուիրած մարգարէները ու եբրայեցի ժողովուրդին առաջնորդները նկատուած են Աստուծոյ ծառաները: Աստուծոյ առաջին ծառան դարձաւ Աբրահամ Նահապետը, որուն հաւատքով լեցուն ծառայական կեանքը մղեց եբրայեցի ժողովուրդը դառնալու ուխտի ժողովուրդ (Մն 15.1-6). ապա Յովսէփ, որ իր ժողովուրդին ծառայեց զանոնք կերակրելով սովի եօթը տարիներուն (Մն 50.20-21). Մովսէս մարգարէն, որ եղաւ իր ժողովուրդը Եգիպտոսի գերութենէն ազատողը եւ անոր Աստուծոյ օրէնքը տուողը (Ել 14). Յեսուն, որուն առաջնորդութեամբ կատարուեցաւ խոստացեալ Քանանու երկրին գրաւումը (Յես 1-21). Դաւիթ մարգարէն, որ Աստուծոյ եւ իր ժողովուրդին միջեւ յաւիտենական ուխտ մը կնքեց (Բ.Թգ 7.18-29). Մոդոմոն թագաւորը, որ նախաձեռնեց Երուսաղէմի տաճարին կառուցման

(Գ.Թգ 6): Տակաւին կարելի է յիշել Գեղէնն եւ Սամփսոն դատաւորները, Սամուէլ ու Անգէա մարգարէները, Եզեկիա եւ Յովսիա թագաւորները եւ ուրիշներ, որոնք Հին Կտակարանին վկայութեան համաձայն դարձան Աստուծոյ ծառաները ու պատգամաբերները եւ իրենց ժողովուրդը հեռացուցին կռապաշտութենէն ու առաջնորդեցին դէպի աստուածային ճշմարտութիւններով ու բարոյական արժէքներով լեցուն կեանք (Դտ 7-8,15: Ա.Թգ 3.10, 7.3-17: Դ.Թգ 23.1-27: Բ.Մն 29-31: Անգ 1.12-15):

Ծառայութիւնը կը կազմէ Նոր Կտակարանին հիմքը, որովհետեւ Նոր Կտակարանին առանցքը հանդիսացող Աստուծոյ Որդին ինքզինք որպէս ծառայ նկատեց եւ որպէս մարդու ու Աստուծոյ ծառայ ապրեցաւ իր երկրաւոր կեանքը ու իրագործեց իր առաքելութիւնը: Ինչպէս Աւետարանը կը վկայէ, «Մարդու Որդին, ինքն ալ, չեկա՛ւ ուրիշներու կողմէ սպասաւորութիւն ընդունելու, այլ սպասաւորելու եւ իր կեանքը շատերու համար որպէս փրկագին տալու» (Մր 10.45: Մտ 20. 28): Իր ուսուցումներուն, հրաշքներուն ու առակներուն ճամբով Քրիստոս յատուկ կերպով շեշտեց ծառայութեան կենսական կարեւորութիւնը մարդու կեանքէն ներս: Այսպէս՝

• Բարի Սամարացիին առակով (Դկ 10.30-37) ու աշակերտներուն ոտքերը լուալով (Յհ 13.1-12), Քրիստոս գործնապէս ցոյց տուաւ ծառայութեան մեծութիւնը:

• Ճշմարիտ ծառայութեան օրինակ դառնալով, Քրիստոս մարդոց թելադրեց ծառայութիւնը նկատելու իրենց կեանքին ուղեգիծը, Աստուծոյ մօտենալու վաւերական ճամբան:

• Իր ծառայական կեանքին օրինակով Աստուծոյ Որդին հրաւիրեց մարդը ծառայելու միայն Աստուծոյ ու աստուածահաճոյ արժէքներուն, ինչպէս կը յիշեցնէ Առաքեալը, թէ՛ ծառայել կը նշանակէ «կուռք»երը ձգելով Աստուծոյ դառնալ (Ա.Թս 1.9):

• Քրիստոս նաեւ յիշեցուց մարդոց, թէ իրաւ ծառայութիւնը պէտք է ըլլայ յօժարական ու անսակարկ: Այլ խօսքով, ծառայողը իր ծառայութեամբ պէտք չէ հպարտանայ. ծառայութիւնը պէտք չէ կատարէ մարդոցմէ գալիք վարձատրութեան համար, որովհետեւ ծառան իր ծառայութեան վարձատրութիւնը պիտի ստանայ Աստուծմէ, ինչպէս Աւետարանը կը յիշեցնէ՝ «անպիտան ծառաներ ենք, ինչ որ պարտաւոր էինք ընել՝ կատարեցինք» (Դկ 17.10):

• Վերջապէս, Քրիստոս մարդուն կողմէ իր նմանին կատարուած ծառայութիւնը կ'ընդունի որպէս իրեն կատարուած ծառայութիւն՝ «կ'ըսեմ ձեզի, որովհետեւ իմ այս փոքր եղբայրներէս մէկուն ըրիք, ինծի ըրած եղաք» (Մտ 25.40):

Արդ, Քրիստոս ծառայութիւնը կը նկատէ մարդուն մէջ աստուածային պատկերը վերականգնելու եւ փրկութեան ճամբով մարդը դէպի Աստուած առաջնորդելու ամենէն վաւերական ճամբան: Ճամբայ մը, որ Քրիստոս իր առաքելութեամբ հունաւորեց եւ իր կեանքով ցոյց տուաւ մարդուն: Քրիստոս ըսաւ՝ «ով որ ուզէ ինծի ծառայել՝ պէտք է ինծի հետեւի, եւ ինծի ծառայողը պիտի ըլլայ հոն՝ ուր ես կը գտնուիմ» (Յհ 12.26):

Բ.

Ծառայութիւնը եկեղեցւոյ հայրերուն ուսուցումներուն մէջ

Առաջին դարու եկեղեցւոյ կեանքին մէջ ծառայութիւնը դարձաւ առանցքային ներկայութիւն: Քրիստոսի անձին օրինակէն ներշնչուած, առաքեալներ ու հաւատացեալներ իրենց առօրեայ

կեանքը լեցուցին ու արժեւորեցին բազմատեսակ ծառայութիւններով: Գործք Առաքելոցի մէջ կը հանդիպինք այնպիսի դէպքերու ու երեւոյթներու, որոնք պերճախօս կերպով կը վկայեն եկեղեցւոյ կեանքին ու վկայութեան մէջ ծառայութեան տիրական ներկայութեան մասին: Ս. Ստեփանոս նախավկան տիպարներէն մէկն է առաջին դարու ծառաներէն (Գրծ 6.1-7): Եկեղեցին որքան աճեցաւ, տարածուեցաւ ու կազմակերպուեցաւ, այնքան ծառայութիւնը դարձաւ քրիստոնէական հաւատքին կենսական տարրերէն ու եկեղեցւոյ կեանքին յատկանշական երեւոյթներէն մէկը:

Եկեղեցւոյ հայրերը իրենց քարոզներուն ու պատգամներուն ճամբով յատուկ շեշտ դրին ծառայութեան վրայ՝ յիշեցնելով որ ան պէտք է դառնայ քրիստոնէայ մարդու կեանքին ուղեցոյցը ու գործին մղիչ ուժը: Այսպէս՝

Ընդհանրական եկեղեցւոյ հայրերէն Յովհան Ոսկերբերան կ'ըսէ՝ «երբ մեր ձեռքերով կը ծառայենք աղքատներուն՝ կ'օրհնուին մեր ձեռքերը. եւ երբ աղքատի մը ծառայելէ ետք մեր ձեռքերը երկինք կը բաձրացնենք՝ Աստուած անմիջապէս կ'ողորմի մեզի եւ կու տայ մեր խնդրանքը»:

Գրիգոր Նիւսացին կը գրէ՝ «աննշան ու անպէտք ծառայութիւն չկայ, այնքան ատեն որ զայն կը կատարենք մաքուր սրտով ու եղբայրասիրութենէ մղուած»:

Օգոստինոս իր կեանքի օրինակով կը վկայէ՝ «երբ Աստուծոյ կը ծառայես՝ Աստուած չէ որ կը մեծնայ. դո՛ւն է որ կը մեծնաս»:

Հերենիմոս կը յիշեցնէ՝ «իբ նմանին ծառայող մարդը՝ նմանակից կ'ըլլայ Քրիստոսի, քանի Քրիստոս ինք եւս ծառայեց մարդոց»:

Հայ եկեղեցւոյ հայրերէն յիշենք մի քանին.-

Յովհաննէս Մանդակունին կը վկայէ՝ «եթէ կը ծառայես տկարներուն՝ Քրիստոսի է որ ծառայած կ'ըլլաս ինքզինքին ծառայողը չի կրնար Աստուծոյ հաւատարիմ ծառան ըլլալ»:

Անանիա Նարեկացին կ'ըսէ՝ «խոնարհ կը նկատուինք երբ մեր նմանը ծառայ չենք դարձներ մեզի, այլ մենք կը ծառայենք անոր»:

Սարգիս Շնորհալին Ճշմարիտ ծառայութեան ակնարկելով, կը գրէ՝ «Աստուծոյ ծառան չի կրնար ծառայել մամոնային. իսկ ան որ մամոնային կը ծառայէ՝ Աստուծոյ ծառայութենէն կը հեռացուի»:

Ստեփանոս Միւնեցին տիպար ծառան կը բնորոշէ հետեւեալ ձեւով՝ «ան որ կը ծառայէ Աստուծոյ կամ իր նմանին վարձատրութիւն ձեռք ձգելու ակնկալութեամբ եւ ոչ թէ սէրէն մղուած, վարձկան կը նկատուի»:

Գ.

Ծառայութիւնը Քրիստոնէական հաւատքին էութիւնն է

Նկատի ունենալով Հին ու Նոր Կտակարաններու ուսուցումները, ինչպէս նաեւ ծառայութիւնը իրենց կեանքին մէջ ապրած եւ իրենց փորձառութեան լոյսին տակ մեզի փոխանցած եկեղեցւոյ

հայրերուն վկայութիւնները, անհրաժեշտ կը նկատենք կարեւորութեամբ ընդգծել հետեւեալ կէտերը.-

Ա) Ծառայութիւնը կեանքի որակ է: Մոսկ կեանքի իւրայատուկ ձեւ կամ ոճ չէ ծառայութիւնը: Ուրիշին նկատմամբ մեր ունեցած սիրոյն, յարգանքին ու նուիրումին շօշափելի արտայայտութիւնն է ծառայութիւնը: Հետեւաբար, ծառայութիւնը պէտք է ամբօրէն շաղախուի մեր մտածումներուն ու գործերուն հետ, մեր ողջ կեանքին հետ: Ծառայութիւնը երբ կը դառնայ մակերեսային, պատահական ու շահադիտական, կը կորսնցնէ իր ճշմարիտ իմաստը: Մարդու կեանքը ծառայութեամբ միայն կ'իմաստաւորուի ու կը հարստանայ. մարդը ծառայութեամբ կը մեծնայ ու կը դառնայ յարգանքի ու գնահատանքի արժանի: Յակոբոս Առաքեալը կ'ըսէ, թէ հաւատքը առանց գործի, այլ խօսքով՝ ծառայութեան, մեռեալ տարր է (Յկ 2.17,26): Մեծ մտածողներէն Կէօթէ կ'ըսէ՝ «կ'ապրի այն մարդը, որ ուրիշներուն համար կ'ապրի»: Նայեցէ՛ք պատմութեան, դիտեցէ՛ք ձեր շուրջը: Ուրիշին համար իրենց ունեցածէն բաժին հանած ու իրենց կեանքն իսկ ընծայաբերած անձերը ապրած են գերեզմանէն անդին: Մեր կեանքը մեզի չի պատկանիր, ան Աստուծոյ պարգեւն է: Արդ, Աստուածատուր մեր կեանքը ծառայութեան ճամբով պէտք է ապրիլ՝ Աստուծոյ, մեր ազգին, մեր եկեղեցոյ ու մեր նմանին համար: Ա՛յս է կեանքը ըմբռնելու ու իրագործելու վաւերական կերպը:

Բ) Ծառայութիւնը կեանքի ճանապարհ է: Երբ ծառայութիւնը դառնայ մեր կեանքին անբաժան ու անբաժանելի բաղադրիչ մասը, ան կը դառնայ մեր կեանքին միակ ճանապարհը: Մեր առօրեայ կեանքին դիմաց, յատկապէս ներկայ աշխարհին մէջ, կան այլազան ու բազմազան ճանապարհներ, որոնք մեզ կ'առաջնորդեն նոր ժամանակներու, Աստուածաշունչի բացատրութեամբ՝ «կոապաշտութեան», կեանքի այնպիսի վիճակներու, ուր մեր անձը կը դառնայ գերագոյն արժէք: Քրիստոնէայ մարդուն համար, Բարի Սամարացիին օրինակով հիւանդը խնամելը, կարիքաւորին օժանդակելը պէտք է դառնայ իր կեանքին միակ ճանապարհը՝ հեռու ամէն տեսակ լուսարձակներէ ու սպասումներէ: Ֆրանսացի հոշակաւոր գրողներէն Վիքթոր Հիլկօ կը յիշեցնէ թէ՛ «միտքը կը հարստանայ իր ստացածով, իսկ սիրտը՝ իր տուածով»: Չհպարտանանք միայն մեր ստացածով կամ ունեցածով, այլ ուրախանանք մեր տուածով, որովհետեւ անոր մէջ Աստուծոյ օրհնութիւնը կայ:

Գ) Ծառայութիւնը կեանքի նպատակ է: Ծառայութիւնը ըլլալով մեր կեանքին ամուր շաղախն ու ճշմարիտ ճանապարհը, պէտք է նաեւ դառնայ մեր կեանքին նպատակը: Վա՛յ այն կեանքին, որ ինքնակեղորոն ու ինքնանպատակ է: Վա՛յ այն անձին, որ իր ամբարած հոգեմտաւոր արժէքները իրեն համար կը պահէ: Վա՛յ այն ունեւորին, որ իր դիզած գումարները իր անձին հաճոյքին ու փառքին համար կը վերապահէ: Չմոռնանք Քրիստոսի պատմած առակը մեծահարուստ երիտասարդին մասին (Մտ 19.16-24): Մեր ունեցածը, այլ խօսքով Աստուծոյ մեզի տուածը, Աստուած ռեւէ ժամանակ կրնայ մեզմէ առնել, Աւետարանի մեծահարուստին նման: Հետեւաբար, մեր ունեցածէն ազգին, հայրենիքին ու եկեղեցոյ տալը պէտք է դառնայ մեր կեանքին յստակ ուղեցոյցը. եւ՝ այսօ՛ր, որովհետեւ վաղը կրնայ ո՛ւր ըլլալ: Չմոռնանք երբէք, որ Աստուծոյ Որդին իր ունեցածէն սոսկ բաժին մը չտուաւ մարդուն, այլ՝ ինքզինք տուաւ: Ճշմարիտ քրիստոնէան ան է, որ իր կեանքը իմաստաւորող ու առաջնորդող նպատակ կ'ընտրէ ուրիշին ծառայելը՝ հեռու ամէն տեսակ ցուցական ու փառասիրական երեւոյթներէ: Պօղոս Առաքեալ կը յորդորէ ըսելով՝ ծառայեցէ՛ք լուռ ու անսակարկ կերպով, եւ ոչ թէ՛ սոսկ մարդոց գնահատանքը շահելու համար (Եփ 16.6-8, Կղ 3.22-24), եւ կոչ կ'ընէ Քրիստոսի հետեւողներուն՝ «որքան ատեն որ ժամանակը մեր ձեռքն է՝ բարիք ընենք բոլորին...» (Գղ 6.10):

Դ.

Ծառայութիւնը եկեղեցւոյ կոչումն է

Ծառայութիւնը դարձաւ Քրիստոսի կեանքին ու առաքելութեան հիմքը, ճանապարհը ու նպատակը: Աստուծոյ Որդին ծառայութեամբ իրագործեց իր փրկագործական ծրագիրը: Այսպէ՛ս պէտք է ըլլայ նաեւ Քրիստոսի փրկագործական ծրագիրը շարունակելու կոչուած Քրիստոսի խորհրդական մարմնոյն՝ եկեղեցւոյ կեանքն ու առաքելութիւնը: Հետեւաբար, իր էութեամբ ու կոչումով ծառայութիւնն է եկեղեցին: Քրիստոս իր երկրաւոր առաքելութեան աւարտին իր աշակերտները աշխարհ դրկեց, որպէսզի անոնք ծառայութեան ճամբով Քրիստոսին աշխարհ բերած արժէքներն ու սկզբունքները փոխանցեն մարդոց եւ, Աստուծոյ թագաւորութեան պատգամաբերները դառնան:

Երբ ընդհանուր ակնարկ մը նետենք եկեղեցւոյ պատմութեան վրայ, պիտի տեսնենք, թէ կեանքի ամենէն դժուար պայմաններուն մէջ իսկ եկեղեցւոյ միակ ճամբան ծառայութիւնն է եղած, անոր հզօրագոյն զէնքը ծառայութիւնն է դարձած: Հոն, ուր եկեղեցին հեռու մնացած է ծառայութենէն, ան փաստօրէն հաւատարիմ չէ մնացած իր կոչումին: Հոն, ուր եկեղեցին ծառայութիւնը դարձուցած է իր կեանքին առանցքը ու նպատակը, ան դարձած է հզօր ու կենսունակ: Հոն, ուր եկեղեցին իր հեղինակութիւնը տեսած է այլ տեղ եւ ոչ թէ ծառայութեան մէջ, ժողովուրդը հեռացած է եկեղեցիէն: Հոն, ուր եկեղեցին ինքզինք նոյնացուցած է ժողովուրդի ցաւին ու տառապանքին հետ՝ դառնալով ծառայական ներկայութիւն ժողովուրդի կեանքէն ներս, ժողովուրդը ամբօրէն կառչած է եկեղեցւոյ:

Հայ եկեղեցին միշտ հաւատարիմ մնացած է իր քրիստոսատուր կոչումին: Դիտեցէ՛ք մեր եկեղեցւոյ կեանքի ճանապարհը՝ Հայաստանէն մինչեւ Կիլիկիա ու ապա Սփիւռք: Մեր կեանքի խաւար ճամբաներուն վրայ, մեր եկեղեցին Աւետարանին լոյսն է սփռած՝ ծառայելով մեր ժողովուրդին. մեր պատմութեան դժնդակ ժամանակներուն, մեր եկեղեցին իր ժողովուրդի կողքին է եղած, դարձեալ ծառայելով մեր ժողովուրդին:

Այսօր եւս, հայ եկեղեցին պէտք է ծառայութիւնը դարձնէ իր կեանքի միակ ճանապարհը, իր առաքելութեան միակ նպատակը: Քրիստոս իր հեղինակութիւնը կերտեց ծառայելով: Մեր եկեղեցին, ինչպէս անցեալին այսօր էւս, ինքզինք պիտի արժեւորէ իր կոչումին հաւատարմութեամբ՝ միայն ծառայելով: Այսօր մեր ժողովուրդին կեանքը այնպիսի սուր կարիքներով, ահաւոր դժուարութիւններով, խոր մտահոգութիւններով ու լուրջ մարտահրաւերներով է լեցուն, որոնց դիմաց մեր եկեղեցին չի կրնար անտարբեր մնալ, դիտողի կամ լսողի կրաւորական վիճակի մէջ ըլլալ: Հեռու ամէն տեսակ մակերեսային, պատահական ու ցուցական ձեւերէն, մեր եկեղեցին կոչուած է ծառայական այնպիսի մօտեցումներ որդեգրել, այնպիսի ձեւեր մշակել, որոնք ըլլան ազդու ու համահունչ՝ տուեալ պայմաններու մեր ժողովուրդի կարիքներուն ու սպասումներուն:

Ե.

Ծառայութիւնը համայնքային ու պետական կառոյցներուն պարտաւորութիւնն է

Ծառայությունը սոսկ կրօնական կամ բարոյական պարտավորություն չէ. ան համամարդկային արժեք է ու անհրաժեշտություն: Հին դարերէն սկսեալ քաղաքակրթութիւններ ու մշակոյթներ, մտածողներ ու արուեստագէտներ յատուկ կերպով ընդգծած են ծառայութեան կարեւորութիւնը ընկերութեան կեանքին մէջ: Իսկ ներկայ ժամանակներուն, միջազգային հոշակագիրներ եւ ընկերութեան կեանքին մէջ գործող կազմակերպութիւններ ու միութիւններ իրենց կանոնադրութիւններու ճամբով կարեւորութեամբ կը շեշտեն ծառայութեան հրամայականը: Արդարեւ, մարդկային ընկերութիւնը փոխադարձ պարտավորութիւններով իրարու առնչուած անհատներու, խմբավորումներու ու կառոյցներու ամբողջութիւն մըն է, եւ զայն դէպի բարելաւում ու յառաջդիմութիւն առաջնորդող հզօր գործօնը ծառայութիւնն է:

Նո՛յնն է պարագան մեր ազգին: Մեր համայնքային կեանքէն ներս կը գործեն զանազան նպատակներու կենսագործման լծուած բազմաթիւ կառոյցներ: Իւրաքանչիւր կառոյցին հիմնական նպատակը մեր ժողովուրդին ծառայել է: Ա՛յս հայեցակէտով հարկ է արժեւորել մեր կազմակերպութիւններուն ու միութիւններուն աշխատանքը: Ոեւէ կառոյց, երբ մեր ժողովուրդին ծառայելը չի նկատեր որպէս իր գոյութեան պատճառը, իր գործունէութեան միակ ուղեցոյցը ու նպատակը, փաստօրէն իրաւունք չունի գոյութիւն ունենալու մեր հաւաքական կեանքէն ներս:

Նո՛յնը հարկ է ըսել պետութեան պարագային: Մեր պետութեան նպատակը, ինչպէս ռեւէ պետութեան, ծառայել է իր ժողովուրդին: Պետութիւն մը ո՛չ ինքնագոյ է եւ ո՛չ ալ ինքնանպատակ: Պետութեան ղեկավարները կ'ընտրուին ժողովուրդին կողմէ, ժողովուրդին ծառայելու համար՝ համարատուութեամբ ու պատասխանատուութեամբ: Ոեւէ պետական իշխանութիւն, որ իր օրէնսդրական, գործադիր եւ իրաւական կառոյցներու ճամբով կը թերանայ ժողովուրդին ծառայելու իր պարտավորութեան մէջ, ընդվզում եւ հակազդեցութիւն կը յառաջացնէ ժողովուրդին մօտ: Մեր սպասումն է, որ հայրենի մեր ժողովուրդին ամբողջական նուիրումով ծառայելը միշտ մնայ հայրենի պետութեան պատասխանատուներուն առաջնահերթ պարտավորութիւնը:

Արդ, նուիրեալ ու անշահախնդիր ծառայութեամբ է որ եկեղեցին կը պայծառանայ, կառոյց մը կը հզօրանայ, համայնք մը կը կազմակերպուի, հայրենիքը կը յառաջդիմէ ու ազգ մը քաջութեամբ կը դիմագրաւէ պատմութեան բոլոր տեսակի փոթորիկները:

Զ.

Ծառայությունը իւրաքանչիւր հայուն պարտքն է ու պատիւը

Ոեւէ կրօնի կամ ազգի պարագային, իր նմանին, ընտանիքին, դրացիին, համայնքին, կրօնին, ազգին ու հայրենիքին ծառայելը բարոյական պարտավորութիւն է, հրամայական անհրաժեշտութիւն է, անսակարկելի պարտք է: Աշխարհի վրայ ապրող իւրաքանչիւր մարդ իր ինքնութիւնը ունի: Ինքնութիւն կ'ենթադրէ պատկանելիութիւն. պատկանելիութիւն կը նշանակէ հաւատարմութիւն. իսկ հաւատարմութիւնը կը պահանջէ ծառայութիւն: Բնականաբար, ծառայութեան կերպերը, մօտեցումները, տարողութիւնը, բնոյթն ու առաջնահերթութիւնները կրնան փոխուիլ: Ունաք իրենց մտաւոր կարողութիւնները ի սպաս կը դնեն իրենց պատկանած հաւաքականութեան առաւել ծաղկման, ուրիշներ հոգեկան կարողութիւնները, եւ տակաւին ուրիշներ՝ իրենց նիւթական կարելիութիւնները: Աստուած մարդը զանազան շնորհներով ու բարիքներով օժտած է: Աստուծոյ սպասումն է, որ մարդը իր շնորհներն ու բարիքները օգտագործէ իր անձին նեղ պարունակէն անդին, ուրիշներո՛ւն համար: Ա՛յսպէս կը պատուիրէ

Աստուածաշունչը: Արդարեւ, ուրիշին ծառայելը Աստուծոյ ծառայել է, ինչպէս կը յիշեցնէ մեզի Քրիստոսի Աւետարանը: Ա՛յս գիտակցութեամբ պէտք է մօտենանք ծառայութեան:

Աստուծոյ ու մարդուն ծառայ դարձած Քրիստոս միշտ կը յիշեցնէ թէ՛ «ով որ ինծի կը հաւատայ թող խաչը առնէ եւ ետեւէս գայ» (Մտ 16.24): Քրիստոսի հաւատալ կը նշանակէ դառնալ Բարի Մամարացի: Քրիստոսի հաւատալ կը նշանակէ՝ Աստուծոյ մեզի տուածէն բաժին մը հանել մեր նմանին, մեր եկեղեցոյ, ազգին ու հայրենիքին: Պատմութեան ամենէն դաժան պայմաններուն մէջ մեր ժողովուրդը հաւատարիմ մնաց քրիստոնէական հաւատքի սկզբունքներուն ու արժէքներուն, նո՛յնիսկ՝ իր արեան գնով: Մեր ժողովուրդի կեանքին մէջ եղան անձեր, որոնք բարձրագոյն աստիճանի նուիրումով ու հաւատարմութեամբ ծառայեցին մեր ժողովուրդին, հայրենիքին ու եկեղեցոյ՝ ոմանք իրենց հոգեմտաւոր ստեղծագործութեամբ, ուրիշներ նիւթական բարերարութեամբ, իսկ ուրիշներ իրենց արիւնը թափելով ու դարձան սուրբեր, հերոսներ, անանձնական ծառայութեամբ իրենց մեծութիւնը կերտած բարերարներ ու անմահներ:

Այսօր մեր ազգը, հայրենիքը, եկեղեցին ու գաղութները ծով կարիքներու դիմաց կը գտնուին: Ո՞վ պիտի հոգայ մեր կարիքները. ո՞վ պիտի ամոքէ մեր ցաւերը. ո՞վ լուծում պիտի գտնէ մեր մտահոգութիւններուն, եթէ ոչ մեր ժողովուրդի զաւակները, յատկապէս անոնք, որոնք կը վայելեն Աստուծոյ իրենց պարգեւած հոգեկան, մտաւոր թէ նիւթական բարիքները: Մեր ունեցած բարիքներէն գէթ մաս մը ազգին տրամադրութեան տակ դնելը իւրաքանչիւր հայուն պարտքն է ու միաժամանակ՝ պատիւը: Ազգին, հայրենիքին ու եկեղեցոյ յաւերժութիւնը երաշխաւորող այս գերագոյն արժէքներու ծառայութեան գանձանակին մէջ, Աւետարանի բառերով՝ մեր «այրիի լուման» դնելը իւրաքանչիւր հայուն սրբազան կոչումն է: Եկէ՛ք, սիրելի հայորդիներ, տէ՛ր կանգնի՛նք մեր նուիրական պարտքին, որպէսզի արժանի դառնանք աստուածային օրհնութեան:

*
* *

Արդ, ներկայ տարին «ԾԱՌԱՅՈՒԹԵԱՆ ՏԱՐԻ» հոչակելով, առաջին հերթին կ'աղօթենք այն բոլոր հայորդիներու հոգիներուն համար, որոնք անցեալին զանազան ձեւերով ու հանգամանքներով ծառայեցին մեր ժողովուրդին: Ինչպէս անմահանուն բանաստեղծներէն Յովհաննէս Թումանեան կ'ըսէ՝ «մահը մերն է մենք մահինը, մարդու գո՛րծն է միշտ անմահ»: Արդարեւ, մեր ազգին, հայրենիքին ու եկեղեցոյ ծաղկման իրենց մասնակցութիւնը բերող հայորդիները՝ մեր հաւաքական կեանքին մէջ կը դառնան յիշատակութեան ու գնահատանքի արժանի անձեր:

Ներկայ տարին «ԾԱՌԱՅՈՒԹԵԱՆ ՏԱՐԻ» հոչակելով, կ'ուզենք յիշեցնել մեր ժողովուրդի զաւակներուն, թէ անհրաժեշտ է առաւել նուիրումով գործօն մասնակցութիւն բերել մեր ազգին ծառայելու վսեմ գործին, այն քաջ գիտակցութեամբ, որ Աստուած պիտի օրհնէ մեր ծառայութիւնը, եւ պատմութիւնը միշտ յարգանքով պիտի յիշէ ո՛չ թէ մեր ունեցածը՝ այլ մեր տուածը, ո՛չ թէ մեր գեղեցիկ խօսքերը՝ այլ բարի գործերը: Պատմութեան փոշիներուն մէջ կը կորսուին անոնք, որոնք միա՛յն ունենալու համար պայքարած են: Պատմութեան մայր էջին վրայ կը մնան միա՛յն անոնք, որոնք տուած են ի խնդիր գերագոյն արժէքներու կենսագործման ու յաւերժացման եւ սրբազան նպատակներու ու վեհ իտէալներու իրականացման: Ա՛յս կը վկայէ պատմութիւնը:

2016 տարին ներկայ Հայրապետական Գիրով «ԾԱՌԱՅՈՒԹԵԱՆ ՏԱՐԻ» հռչակելով, կոչ կ'ուղղենք մեր Թեմակալ Առաջնորդներուն, Ազգ. իշխանութեանց, համայնքային, կուսակցական, ազգային, բարեսիրական, կրթական, մարզական ու մշակութային միութիւններուն ու կազմակերպութիւններուն, լուսարձակի տակ բերելու ծառայութեան կենսական կարեւորութիւնը մեր կեանքէն ներս եւ զանազան ձեռնարկներու ճամբով՝

- Գնահատելու գաղութին ծառայութիւն մատուցած ազգայինները:
- Յիշեցնելու, յատկապէս երիտասարդներուն, ազգին ծառայելու հրամայականը՝ մեր հաւաքական կեանքին իրենց գործօն մասնակցութեամբ:
- Կոչ ուղղելու զանազան կարողութիւններով ու կարելիութիւններով օժտուած մեր ազգայիններուն, որ օգտակար հանդիսանան գաղութի ծաղկման, եկեղեցւոյ պայծառացման, հայրենիքի հզօրացման ու ազգի յառաջդիմութեան նպաստող ծրագիրներուն ու աշխատանքներուն:

Այս մտածումներով ու սպասումներով անգամ մը եւս կ'օրհնենք մեր ժողովուրդի սիրելի զաւակները ու կ'աղօթենք առ Բարձրեալն Աստուած, որ առողջութեան, յաջողութեան ու երջանկութեան բարիքներով հարստացնէ մեր ժողովուրդի զաւակներուն կեանքը:

Հայրական ջերմ սիրով,

Աղօթարար՝

**ԱՐԱՄ Ա. ԿԱԹՈՂԻԿՈՍ
ՄԵԾԻ ՏԱՆՆ ԿԻՒԿԻՈՅ**

1 Յունուար, 2016
Անթիլիաս, Լիբանան

ԹԵՄԻՆ ԱՌԱՋՆՈՐԴԻ ՕՐՀՆԱԲԵՐ ԱՅՑԸ ՔՈՒԷԹԻ ԱԶԳԱՅԻՆ ՎԱՐՃԱՐԱՆ

Հինգշաբթի, 3 Մարտ 2016-ի առաւօտեան ժամը 11:00-ին, Քուէյթի Ազգային վարժարանի 11-րդ եւ 12-րդ կարգի աշակերտները մեծ ուրախութեամբ դիմաւորեցին թեմիս բարեջան առաջնորդ՝ Տ. Մասիս Ծ. Վրդ. Զօպոյեանին, որ յատուկ առիթով մը եկած էր հանդիպելու ճեմարանի աշակերտներուն հետ:



Գերապատիւ Հայր Սուրբը իր հանդիպման ընթացքին անդրադաձաւ Վեհափառ Հայրապետի կողմէ հռչակուած «Ծառայութեան Տարի» կոնդակի մասին ու մանրամասնեց ծառայութեան վեհ գաղափարի կարեւորութիւնն ու անհրաժեշտութիւնը, ընդհանրապէս մարդկային եւ մասնաւորապէս հայու կեանքէն ներս:

Իր կարգին վարժարանիս տնօրէն Պրն. Մանուկ Մանուկեան շնորհակալութիւն յայտնեց Հայր Սուրբին իր օգտաշատ դասախօսութեան համար ու հաստատեց թէ նման հանդիպումներ աւելի կը մօտեցնեն նոր սերունդը Հայ Եկեղեցւոյ:

www.armenianprelacykw.com

ՀԱՅԿԱԿԱՆ

«Ֆրանսայի Մէջ Հայոց Ծեղասպանութեան Ժխտումը Քրեականացնող Նոր Օրինագիծը Պատրաստ Պիտի Ըլլայ Մինչեւ Ապրիլ» Կ'ըսէ Մուրատ Փափազեան

Ֆրանսայի հայկական կազմակերպութիւններու համակարգող խորհուրդի համանախագահ, ՀՅԴ Բիւրոյի անդամ Մուրատ Փափազեան «Արմէնփրես»-ի հետ հարցազրոյցի մը ընթացքին յայտնած է, որ Ֆրանսայի մէջ Հայոց ցեղասպանութեան ժխտումը քրեականացնող նոր օրինագիծը պէտք է իրաւական ամուր հիմերու վրայ ըլլայ:

«Ինչպէս գիտէք, Ֆրանսայի նախագահ Ֆրանսուա Հոլլանտ հաստատած է, որ խորհրդարանին պիտի ներկայացուի Հայոց ցեղասպանութեան ժխտումը քրեականացնող նոր օրինագիծը: Նախագահ Հոլլանտ օրինագիծի պատրաստման հոլովոյթը վստահած է Մարդկային իրաւանց եւրոպական դատարանի նախկին նախագահ Ժան Փոլ Քոսթային: Ան շատ լաւ մասնագէտ է, յայտնի իրաւաբան: Նախատեսուած է, որ նախագիծը պատրաստ ըլլայ մինչեւ ապրիլ եւ կառավարութիւնը զայն ներկայացնէ խորհրդարանին», ըսած է Մուրատ Փափազեան՝ աւելցնելով, որ 10 տարիէ ի վեր այս խնդիրին ուղղութեամբ կ'աշխատին եւ կ'ուզեն, որ այս տարի անիկա վերջնական լուծում ստանայ: Մուրատ Փափազեանի խօսքով, պէտք է նոր օրինագիծը իրաւական ամուր հիմերու վրայ ըլլայ, որպէսզի Սահմանադրական դատարանը զայն չբեկանէ:

«Երբ խորհրդարանը օրինագիծը քննարկէ եւ հաստատէ, ատկէ ետք անպայման մեր թշնամիները պէտք է հարցը տանին Սահմանադրական դատարան, ինչպէս եղաւ 2012-ին: Հետեւաբար իրաւական ամուր հիմեր պէտք է ըլլան, որպէսզի դատարանը չբեկանէ», նշած է ան:

Փափազեան յայտնած է, որ Արցախի հարցին առնչութեամբ լուրջ աշխատանք պիտի տարուի, որպէսզի յաջողութիւններ արձանագրուին Արցախի ճանաչման առումով:

«Չենք կրնար ըսել, որ Արցախը այս տարի պիտի ճանչցուի, սակայն գոնէ որոշ հանգրուանի մը պէտք է հասնինք, յառաջընթաց ըլլայ: Գիտենք, որ կը խօսուի դարաբաղեան խնդիրին հետ կապուած նոր առաջարկներու մասին: Չենք կրնար ըսել, որ լաւատես ենք, վերջնական լուծում պիտի ըլլայ, սակայն որեւէ քայլ դէպի խաղաղութիւն պէտք է արձանագրել», ըսած է Ֆրանսայի հայկական կազմակերպութիւններու համակարգող խորհուրդի համանախագահը:

Մուրատ Փափազեան նշած է, որ կը նկատուի Ֆրանսայի երեսփոխաններու աշխատանք՝ Արցախի հետ: «Կազմակերպուած են այցելութիւններ դէպի Արցախ, եւ տեղւոյն վրայ խնդիրին, իրավիճակին ծանօթանալէ ետք պատկերացումները փոխուած են: Այս տարի նոյնպէս կը նախատեսենք տարբեր խումբերու այցելութիւններ կազմակերպել դէպի Արցախ», աւելցուցած է ան:

Ֆրանսահայութեան համար յաջորդ կարեւոր հարցը սուրիահայութեան զօրակցիլն է: «Սուրիահայութեան վիճակը ծանր է, շատ կարեւոր է մեր ազգակիցներուն աջակցիլը: Ֆրանսայի հայկական համայնքը իր զօրակցութիւնը պիտի յայտնէ, որպէսզի փրկուի Մուրիոյ համայնքը: Աջակցութիւնը պիտի ըլլայ թէ՛ ֆինանսական, թէ՛ մեր կապերու տեսքով», ըսած է Փափազեան՝ նշելով, որ Ֆրանսա մեկնող սուրիահայերուն թիւը քիչ է, իսկ անոնք, որոնք կ'երթան, հիմնականին մէջ այդտեղ հարազատներ ունեցողներն են:

Ընդդիմադիր 6 Ուժերու Միացեալ Հաւաք-Երթը՝ Ի Յիշատակ Մարտ 1-ի Զոհերուն

1 Մարտին Երեւանի մէջ տեղի ունեցաւ ընդդիմադիր 6 ուժերու միացեալ հաւաք-երթը՝ ի յիշատակ 1 Մարտ 2008-ի դէպքերու զոհերուն:

Հաւաքին իրենց մասնակցութիւնը բերին Հայ ազգային քննկրեսի, Նոր Հայաստանի ու Հայաստանի ժողովրդական կուսակցութեան, Պարոյր Հայրիկեանի ղեկավարած Ազգային ինքնորոշում միաւորումի, Աշոտ Մանուչարեանի «Հայաստան» նախաձեռնութեան ու Նիկոլ Փաշինեանի ղեկավարած Քաղաքացիական պայմանագիրի հետեւորդները:

Միասնական հաւաք-երթին կարգախօսն էր «Ընդդէմ պետական ահաբեկչութեան», անոր կը հսկէին ոստիկանները, որոնք մեխակներ բռնած էին: Երթին մասնակիցները ուղղուած են դէպի Ալեքսանդր Միասնիկեանի արձանը՝ մահացածներուն յիշատակը յարգելու համար:

Անկէ առաջ Ազատութեան հրապարակին վրայ կայացաւ Նոր Հայաստան միաւորման, Հայաստանի ժողովրդական կուսակցութեան եւ Հայ ազգային քննկրեսի միացեալ հաւաք:

Հայ ազգային քննկրեսին կողմէ բացման խօսքով հանդէս եկաւ Արամ Մանուկեան եւ նշեց, որ հանրահաւաք տեղի պիտի չունենայ, որովհետեւ 1 Մարտի զոհերուն հարազատները չեն ուզած, որ այս օրուան հաւաքը ծառայէ քաղաքական նպատակներու:

Փաստաթուղթին իրենց ստորագրութեամբ միացած կազմակերպութիւնները պահանջեցին հետեւողական ըլլալ Մարտ 1-ի կազմակերպիչներն ու գործադրողները պատասխանատուութեան կանչելու եւ դատելու գծով:

Օհանեան. «Պատրաստ ենք Մեր Երկիրը Եւ Մեր Երկրի Սուրբ Մասը Հանդիսացող Արցախը Պաշտպանելու»

1 Մարտին Գիտութիւններու ազգային ակադեմիայի հիմնարկներու տնօրէններուն եւ գիտնականներուն հետ տեղի ունեցած հանդիպումին ընթացքին Հայաստանի պաշտպանութեան նախարար Մէլքոն Օհանեան խօսած է սահմանային կացութեան, բանակի պատրաստութեան եւ ներքին ու արտաքին Մարտահրաւերներու դիմակայման ձեւերուն մասին:



Պատասխանելով պատերազմի վերսկսման հաւանականութեան մասին հարցումի մը՝ նախարարը յայտնած է, որ անիկա կախեալ է երկխօսութեան կառչած մնալէն եւ վստահութեան մթնոլորտի ձեւաւորումէն: Անոր համաձայն, հակառակորդը չ'ուզեր կառուցողական աշխատանք տանիլ, չ'ուզեր առաջին զիծին վրայ գերծ մնալ տարբեր տիպի ոտնձգութիւններէն, չիսխատել զինադադարի դրութիւնը, կրակ չբանալ, հետախուզական-ներթափանցման գործողութիւններու չձեռնարկել: Ան դիտել տուած է, որ պաշտպանութեան նախարարութիւնը ամէն օր կը պատրաստուի պատերազմի. «Մենք չենք վախնար, պատրաստ ենք մեր երկիրը եւ մեր երկրի սուրբ մասը հանդիսացող Արցախը պաշտպանելու ամէն գնով», հաստատած է նախարարը:

ՀՀ Նախագահը Դիւանագէտի օրուան առթիւ պարգէատրեց ու աստիճաններ շնորհեց շարք մը դիւանագէտներու



ՀՀ Նախագահ Սերժ Սարգսեանի Մարտ 1-ի հրամանագիրներով, Դիւանագէտի օրուան առթիւ, երկարամեայ անբասիր գործունէութեան համար Պելճիքայի մէջ Հայաստանի Հանրապետութեան արտակարգ և լիազօր դեսպան Թաթուլ Մարգարեանը եւ Հայաստանի Հանրապետութեան արտաքին գործերու նախարարի տեղակալ Աշոտ Յովակիմեանը պարգէատրեց «Հայրենիքին մատուցած ծառայութիւններու համար» 2-րդ աստիճանի մետալով:

ՀՀ Նախագահի երեք այլ հրամանագիրներով, Դիւանագէտի օրուայ առթիւ, արդիւնավէտ և բարեխիղճ գործունէութեան համար Հայաստանի Հանրապետութեան արտաքին գործերու նախարարութեան մամլոյ քարտուղար Տիգրան Պալեանը, արտաքին գործերու նախարարութեան մամուլի, տեղեկատուութեան եւ հասարակութեան հետ կապերու վարչութեան պետի պաշտօնակատար Տիգրան Մկրտչեանը և Նախագահի օգնական Վարուժան Ներսէսեանը պարգէատրուեցան Միսիթար Գոշի մետալով:

Հայաստանի Հանրապետութեան նախագահ Սերժ Սարգսեան ղեկավարելով 2005-ի փոփոխութիւններով Հայաստանի Հանրապետութեան Սահմանադրութեան 55-րդ յօդուածի 16-րդ կէտով եւ հիմք ընդունելով «Դիւանագիտական ծառայութեան մասին» Հայաստանի Հանրապետութեան օրէնքի 20-րդ յօդուածի Ա. մասը՝ Չորեքշաբթի օր որոշած է.

Հայաստանի Հանրապետութեան արտակարգ եւ լիազօր դեսպանի դիւանագիտական աստիճան շնորհել՝

Արտակ Ապիտոնեանին՝ Շուէտի Թագաւորութեան մէջ Հայաստանի Հանրապետութեան արտակարգ եւ լիազօր դեսպան:

Արայիկ Բաղալեանին՝ ՀԱՊԿ-ի գլխաւոր քարտուղարի տեղակալ:

Արմէն Ղեւոնդեանին՝ Հայաստանի Հանրապետութեան արտաքին գործոց նախարարի խորհրդական:

Ճատէլ Չարչոյլեանին՝ Քուէյթի մէջ Հայաստանի Հանրապետութեան արտակարգ եւ լիազօր դեսպան:

Արմէն Պապիկեանին՝ Եւրոպական խորհուրդին մէջ Հայաստանի Հանրապետութեան մնայուն ներկայացուցիչ:

Հայաստանի Հանրապետութեան արտակարգ դեսպանորդ եւ լիազօր նախարարի դիւանագիտական աստիճան շնորհուած է՝

Հրայր Կարապետեանին՝ Ս. Փէթերսպուրկի մէջ Հայաստանի Հանրապետութեան գլխաւոր հիւպատոս:

Գագիկ Յովհաննիսեանին՝ Հայաստանի Հանրապետութեան արտաքին գործոց նախարարութեան սպառազինութիւններու վերահսկման եւ միջազգային անվտանգութեան վարչութեան ՕԹԱՆ-ի բաժնի խորհրդական:

Յասմիկ Տոլմաջեանին՝ Զուիցերիոյ մէջ Հայաստանի Հանրապետութեան դեսպանութեան արտակարգ դեսպանորդ եւ լիազօր նախարար:

ՇՆՈՐՀԱԻՈՐԱԳԻՐ

Չորեքշաբթի՝ 02 Մարտ 2016-ին, «Դիւանագիտական Օր»ուան կապակցութեամբ, Հայաստանի Հանրապետութեան Նախագահ՝ Սերժ



Սարգսեանի հրամանագիրով, Հայաստանի Հանրապետութեան արտակարգ և լիազօր դեսպանի դիւանագիտական աստիճան շնորհուեցաւ Ֆատէյ Զարչօղլեանին՝ Քուէյթի մէջ Հայաստանի Հանրապետութեան արտակարգ և լիազօր դեսպան:

Քուէյթի եւ Շրջակայից Թեմի բարեջան առաջնորդ՝ Գերապատիւ Տէր Մասիս Ծ. Վրդ. Զօպուլեանի, Երեսփոխանական Ժողովի, Ազգային վարչութեան եւ Քուէյթի մէջ գործող ազգային մարմիններու անունով կը շնորհաւորենք դեսպան՝ Ֆատէյ

Զարչօղլեանը եւ կը մաղթենք մշտանորոգ յաջողութիւններ՝ ապագայի իր դիւանագիտական բոլոր գործունէութիւններուն մէջ:

Մենք բարձր կը գնահատենք Հայաստան-Քուէյթ յարաբերութիւններու զարգացման մէջ Ձեր կատարած տքնաջան աշխատանքն ու ներդրումը: Թող Ձեր նուիրական բազմաբեղուն աշխատանքներով շարունակէք Ձեր ազգանպաստ առաքելութիւնը՝ յանուն մեր հայրենիքի բարգաւաճման:

Ձեզի կը մաղթենք առողջութիւն, արեւշատութիւն եւ նորանոր վերելքներ:

Քուէյթ, 04 Մարտ, 2016

Ի ԴԻՄՍՅ՝
Քուէյթի Ազգային Վարչութիւն

Ընտրական Նոր Օրենսգիրքի Նախագիծը Պատրաստ Է Եւ Պիտի Վաւերացուի Կառավարութեան Կողմէ

Կառավարութեան նիստի օրակարգին վրայ ներառուած է նոր Ընտրական օրենսգիրքի նախագիծը սահմանուած կարգով Հայաստանի Հանրապետութեան Ազգային ժողով ներկայացնելու հարցը:

Նաեւ պիտի քննարկուի «Վարչական իրաւախախտումներու վերաբերեալ Հայաստանի Հանրապետութեան Օրենսգիրքին մէջ փոփոխութիւններ եւ լրացումներ կատարելու մասին», «Հայաստանի Հանրապետութեան վարչական դատավարութեան օրենսգիրքին մէջ փոփոխութիւններ եւ լրացումներ կատարելու մասին», «Հայաստանի Հանրապետութեան քրեական օրենսգիրքին մէջ փոփոխութիւններ կատարելու մասին», «Սահմանադրական դատարանի մասին» Հայաստանի Հանրապետութեան օրէնքին մէջ փոփոխութիւններ կատարելու մասին», «պատկերասփիւռի եւ ձայնասփիւռի մասին» Հայաստանի Հանրապետութեան օրէնքին մէջ լրացումներ կատարելու մասին», «Տեղական ինքնակառավարման մասին» Հայաստանի Հանրապետութեան օրէնքին մէջ լրացում եւ փոփոխութիւն կատարելու մասին», «Գնումներու մասին» Հայաստանի Հանրապետութեան օրէնքին մէջ լրացում կատարելու մասին», «Կուսակցութիւններու մասին» Հայաստանի Հանրապետութեան օրէնքին մէջ լրացում եւ փոփոխութիւն կատարելու մասին», «Պետական պաշտօններ զբաղեցնող անձերու վարձատրութեան մասին» Հայաստանի Հանրապետութեան օրէնքին մէջ փոփոխութիւն կատարելու մասին», «Երեւան քաղաքին մէջ տեղական ինքնակառավարման մասին» Հայաստանի Հանրապետութեան օրէնքին մէջ լրացում եւ փոփոխութիւն կատարելու մասին» Հայաստանի Հանրապետութեան օրէնքներու նախագիծերու ծրարին համաձայնութիւն տալու եւ սահմանուած կարգով Հայաստանի Հանրապետութեան Ազգային ժողով ներկայացնելու հարցը:

Տաւութօղլու Հայերը Վիրաւորող Եւ Քիւրտերուն Սպառնացող Յայտարարութիւն Կատարած Է

«Մարմարա» կը հաղորդէ, որ Թուրքիոյ վարչապետ Ահմէթ Տաւութօղլու անգամ մը եւս հայերուն նկատմամբ թշնամանք հրահրող յայտարարութիւն մը ունեցած է:


Արդարեւ, թրքական «T24.com» կայքը կը հաղորդէ, որ Տաւութօղլու, փորձելով քննադատել քրտամէտ Ժողովուրդներու ժողովրդավարական կուսակցութիւնը՝ յայտարարած է. «Քիւրտերը, հայ աւագակախումբերուն նման, Ռուսիոյ հետ կը համագործակցին եւ կ'երթան Մոսկուայի մէջ ներկայացուցչութիւն բանալու»:

Քրտամէտ կուսակցութեան համանախագահ Սելահէթթին Տեմիրթաշ, իր կարգին, վարչապետին յայտարարութեան փոխադարձած է՝ ըսելով. «Վարչապետը ըսել կ'ուզէ, թէ Ժողովուրդներու ժողովրդավարական կուսակցութիւնը կը նմանի հայերուն, որոնք համագործակցեցան ռուսերուն հետ. «Այն ինչ որ 1915-ին հայերուն ըրինք, նոյնն ալ ձեզի կ'ընենք», ըսել կ'ուզէ: Ահաւասիկ ա՛յս է իշխող կուսակցութեան գաղափարախօսութիւնը: Ուրիշ բան չէ, եթէ ոչ՝ կոտորածի ու մահուան քաղաքականութիւն իրականացնել: Մեր կուսակցութիւնը, բացի ժողովուրդէն, ուրիշ ո՛չ մէկուն հետ համագործակցած է ու պիտի համագործակցի: Մենք կը հաւատանք միասնութեան ու դաշնութեան: Մենք արդէն իսկ ժողովուրդի մը ուժն ենք»:

ՄԻՋԱԶԳԱՅԻՆ

Ծոցի Համագործակցության Խորհուրդի Երկիրները Հրգպալյան «Ահաբեկչական» Նկատող Որոշում Մը Որդեգրեցին

Ծոցի համագործակցության խորհուրդի ընդհանուր քարտուղար Ապտել Լաթիֆ Զայանի յայտարարեց, որ խորհուրդը որոշած է Հրգպալյան, իր բոլոր ղեկավարներով, թեւերով եւ անոր առնչուած կազմակերպութիւններով միատեղ նկատել «ահաբեկչական կազմակերպութիւն»՝ նշելով. «Խորհուրդի անդամ երկիրները այս որոշումը որդեգրեցին այդ միլիտի անդամներուն՝ ահաբեկչական արարքներ գործելու համար Ծոցի երկիրներու երիտասարդները զինուորագրելուն, մաքսանենգման, սադրանք հրահրելուն, քառս ու բռնարարքներ գրգռելու, իրենց գերիշխանութեան, անվտանգութեան ու կայունութեան բացայայտ բռնաբարում եղող արարքներուն իբրեւ հետեւանք»:



Հաղորդագրութիւնը կը շեշտէ. «Համագործակցության խորհուրդի երկիրները խորհուրդի անդամ երկիրներուն մէջ Հրգպալյայի գործունէութիւնը, ինչպէս նաեւ Սուրիոյ, Եմէնի եւ Իրաքի մէջ ահաբեկչական ու գրգռիչ արարքները կը նկատեն բարոյականութեան, մարդկայնականութեան եւ միջազգային օրէնքին հակասող, ինչպէս նաեւ արաբական ազգային անվտանգութեան սպառնալիք մը»:

«Նկատի ունենալով այդ միլիտներուն ահաբեկչական գործունէութիւնները՝ խորհուրդի անդամ երկիրները որոշեցին զայն նկատել ահաբեկչական կազմակերպութիւն, եւ իրենց որոշումը գործադրելու համար անհրաժեշտ միջոցառումները պիտի որդեգրուին՝ հիմնուելով խորհուրդի անդամ երկիրներուն մէջ ահաբեկչութեան դէմ պայքարի վերաբերեալ օրէնքներուն եւ միջազգային նոյնպիսի օրէնքներու վրայ»:

Քուէյթի խորհրդարանը յայտարարեց. «Ծոցի համագործակցության խորհուրդի որոշումէն ետք, «Թուիթթըր»-ի վրայ կամ այլուր «ահաբեկչական» Հրգպալյայի աջակցութեան կամ համակրութեան որեւէ արտայայտութիւն կը նկատուի քրէական յանցանք՝ ելեկտրոնային ոճիրներու օրէնքին հիմամբ»:

Իրանի արտաքին գործոց նախարարութիւնը դատապարտեց Ծոցի համագործակցության խորհուրդին կողմէ որդեգրուած որոշումը: Նախարարութեան բանբեր Մուրթատա Սարմատի ռուսական «Սփութնիք» լրատու գործակալութեան յայտնեց, որ «այդ որոշումը անպատասխանատու որոշում է»՝ նշելով. «Շրջանին մէջ գործող ահաբեկչական կազմակերպութիւնները արդէն ծանօթ են բոլորին»:

«Հրգպալյան իսրայէլեան էութեան դէմ դիմադրութիւն կատարող կուսակցութիւն է», ըսաւ ան՝ նշելով, որ զայն ահաբեկչական նկատելու որոշումին որդեգրումը կատարուած է դիմադրութեան դէմ դաւադրութեան պայմաններուն մէջ եւ Իսրայէլի մատուցուած ծառայութիւն մըն է:

Մուրիդյ արտաքին գործոց նախարարությունը խստի դատապարտեց Հրզպալլան ահաբեկչական նկատող Ծոցի համագործակցութեան խորհուրդին որոշումը:

Իսրայելի արտաքին գործոց նախկին նախարար Ցիփի Լիվնի յայտարարեց. «Ծոցի համագործակցութեան խորհուրդին կողմէ Հրզպալլան ահաբեկչական կազմակերպություն նկատելը կարելու է ճշգրիտ հարց մըն է»:

Յորդանանի Իրայիտ Քաղաքին Մէջ Ապահովական Գործողութիւն՝ Սալաֆական Խմբաւորումի Մը Դէմ

Յորդանանեան ապահովական ուժերը Չորեքշաբթի օր առաւօտեան ժամը 3:00-ին հիւսիսային Յորդանանի Իրայիտ քաղաքին մէջ սալաֆական խմբաւորումի մը դէմ կատարեցին գործողութիւն մը, որուն ընթացքին ապահովական ուժերէն արձանագրուեցաւ զոհ մը եւ երկու վիրաւոր: Սպաննուեցան 7 զինեալներ:

Յորդանանեան ապահովական ուժերը հետագային յաւելեալ ուժեր բերին շրջան եւ ձերբակալեցին շուրջ քսան սալաֆական զինեալներ:

Միւս կողմէ, ԱՖՓ լրատու գործակալութիւնը հաղորդեց, որ յորդանանեան գաղտնի սպասարկութիւնը երկրին մէջ ՏԱՀԵՇ-ի կողմէ ահաբեկչական գործողութիւն մը կանխարգիլած է:

Թուրքիան ՕԹԱՆ-ի Նաւերուն Զէ Արտօնած Մուտք Գործել Իր Ջրային Տարածքը

ԱՖՓ լրատու գործակալութիւնը կը հաղորդէ, որ Թուրքիա ՕԹԱՆ-ի մարտանաւերուն չէ արտօնած մուտք գործել Եգէական ծովուն մէջ գտնուող իր ջուրերը: Դաշինքի մարտանաւերուն առաքելութիւնն էր Թուրքիայէն Յունաստան, ապա նաեւ Եւրոպական այլ երկիրներ ապօրինի գաղթականներ փոխադրող նաւակները գրաւելը:

Պրիւքսէլի մէջ քանի մը դիւանագիտական աղբիւրներ հաստատած են տեղեկութիւնը: Ըստ անոնցմէ մէկուն, ՕԹԱՆ-ի առաքելութեան նկատմամբ Անգարայի դիրքորոշումին մասին յայտնի դարձած է սկիզբէն:

Թուրքիա կը պնդէ, որ նաւերու տեղակայման շրջանները որոշելու համար ՕԹԱՆ-ի ծովային խմբաւորման գերմանացի հրամանատար Եորկ Քլայն պետք է այցելէ Անգարա: ՕԹԱՆ կը մերժէ ատիկա կատարել:

ՕԹԱՆ-ի անդամ երկիրներու պաշտպանութեան նախարարները 11 փետրուարին հաստատած էին Եգէական ծովուն մէջ գաղթականները ապօրինի կերպով տեղափոխողներուն դէմ գործողութիւններու սկիզբը: Ծրագիրի նախաձեռնութիւնը կը պատկանի Գերմանիոյ, Յունաստանին եւ Թուրքիոյ: Գործողութիւնը կը ղեկավարէ Գերմանիա:

ՕԹԱՆ-ի նաւերը պետք է կանգնեցնեն գաղթականներ փոխադրող նաւերը եւ զանոնք վերադարձնեն Թուրքիա:

ԱՆՆՄԱՆՄԱՐԶ

Խոստովանութիւն

Թուրքիոյ Մահմանադրական դատարանը 25 փետրուարին ազատ արձակեց թրքական «Ճումհուրիյէթ» օրաթերթի գլխաւոր խմբագիր Ճան Տիւնտարը եւ օրաթերթի Անգարայի գրասենեակի ղեկավար Էրտեմ Կիլը, որոնք 2015-ին թերթին մէջ փաստաթուղթեր հրապարակած էին յունուար 2014-ին ոստիկանութեան կողմէ կանգնեցուած, Թուրքիայէն Սուրիա զենք-զինամթերք փոխադրող բեռնատարերուն վերաբերեալ: Օրին դէպքին առնչակից ոստիկանները պաշտօնէ վտարուած էին: 28 փետրուարին Թուրքիոյ նախագահ Ռեճեփ Թայիփ Էրտողան յայտարարեց. «Վճիռին նկատմամբ յարգանք չունիմ: Չայն պիտի չյարգեմ»: Ան նշեց, որ երկու լրագրողներուն կատարածը «մամլոյ ազատութեան հետ որեւէ կապ չունի», այլ՝ լրտեսութեան:



Երկրի մը բնակիչներուն համար իրապէս մտահոգիչ պէտք է ըլլայ, երբ իրենց երկրին նախագահը հրապարակաւ կը յայտարարէ, թէ Մահմանադրական դատարանին վճիռին նկատմամբ յարգանք չունի եւ զայն պիտի չյարգէ, մանաւանդ երբ նշեալ նախագահը աշխատանք կը տանի երկրին մէջ կառավարման նախագահական համակարգ հաստատելու: Ժողովրդավարական երկիրներու մէջ նախագահ մը բնականաբար իրատուք ունի վճիռին նկատմամբ տարակարծիք ըլլալու: Ասիկա անոր անձնական կարծիքն է, սակայն այդ տարակարծութիւնը հրապարակաւ արտայայտելու պարագային բնականաբար պիտի վերածուէր նախագահի կարծիքի եւ ընդվզում յառաջացնելով «ամբարտաւան» նախագահը թիրախ պիտի դարձնէր բուռն քննադատութեանց: Ան այդ գայթակղութեան համար քաղաքական սուղ գին պիտի վճարէր եւ անոր կուսակիցները անկէ պիտի հեռանային, ինչպէս առնէտները՝ ընկղմող նաւէն: Թուրքիոյ մէջ, սակայն, Էրտողանի կուսակիցները ոչ միայն անոր կեցուածքը պաշտպանեցին, այլ՝ խորհրդարանին մէջ յարձակում գործեցին անոր այդ կեցուածքը քննադատող ընդդիմադիր երեսփոխաններուն դէմ:

Ուշադրութեան արժանի է այն երեւոյթը, որ «Ճումհուրիյէթ»-ի աւագ խմբագիրն ու լրագրողը կ'ամբաստանուին «լրտեսութեամբ», այսինքն՝ պետական գաղտնիքներու բացայայտումով: Այդ ամբաստանութիւնը խորքին մէջ խոստովանութիւն մըն է, թէ թրքական պետութիւնը մեղսակից է Սուրիոյ մէջ ահաբեկչական խմբաւորումներու զենքի մատակարարման: Այլապէս ամբաստանութիւնը պիտի ըլլար «կեղծ փաստաթուղթերու հրապարակում» եւ «պետութեան աղարտում»: «Լրտեսութեան» ամբաստանութիւնը կու գայ վերահաստատելու բոլորին ծանօթ եւ յաճախ հնչող ամբաստանութիւնը՝ ուղղուած թրքական իշխանութիւններուն, որոնք զայն կտրուկ կերպով կը մերժէին, սակայն ահա զայն կը խոստովանին դատական իշխանութեան եւ երկրի նախագահին մակարդակով:

ՎԱՀՐԱՍ ԷՄՄԻԵԱՆ

ՊԱՏԱՆԵԿԱՆԻ ԱՆԿԻՆԸ

Սօսէ Մայրիկը



Բուն անունով ` Սօսէ Վարդանեան, ծնած է 1865 թուականին Արեւմտեան Հայաստանի Տուրուբերան նահանգի, Խլաթ շրջանի Թեղուտ գիւղին մէջ: 13 տարեկանին ամուսնացած է Մերոբի՝ ապագայ նշանաւոր ֆետայի Մերոբ Աղբիւրի հետ:

1890-ական թուականներուն Մերոբ մեկնեցաւ պանդխտութեան իսկ Սօսէն իր գաւկին՝ Յակոբի հետ մնաց Սոխորդ: 1895 թուականին, երբ Մերոբը վերադարձաւ Խլաթ, սկսաւ քարոզել՝ «Տղաք, առանց հացի մնացէք, առանց զէնքի մի մնաք»: Սօսէն դարձաւ Մերոբի կողքը և անոր զինակիցը: Ֆետայիներուն սկզբունքներէն մէկն էր՝ չամուսնանալ, իսկ նախապէս ամուսնացած լինելու պարագային՝

հեռու մնալ իրենց ընտանիքներէն: Սակայն Սօսէն մնաց իր ամուսինին հետ:

1899 թուականին Մերոբի թաքստոցն էր Գեալիգուզան գիւղը: Հայ դաւաճան մը ոչ միայն մատնած է Մերոբին, այլեւ անոր ծխախոտին մէջ թոյն դնելով փորձած է թունաւորել զայն: Երբ թշնամին պաշարեց գիւղը, Մերոբ այնքան տկար էր, որ ոտքի վրայ չէր կրցած մնալ. Սօսէն ամուսինին հանեց գիւղէն դէպի մօտակայ լեռը: Կնոջը օգնութեամբ, Մերոբ ութ ժամ անընդմէջ կռուեցաւ թշնամիին դէմ, բայց երբ թրքական գնդակը վերջ տուաւ իր կեանքին, Սօսէն քաջ հայուհի մը ըլլալով անմիջապէս անոր ձեռքէն վերցուց հրացանը և շարունակեց կռուիլ: Այս մարտի ժամանակ սպաննուեցաւ նաև Սօսէի և Մերոբի անդրանիկ որդին՝ Յակոբը: Թէև վիշտը ճնշած էր անոր, սակայն արցունքները կուլ տալով՝ Սօսէն կրակեց, շարունակ կրակեց...



Անհաւասար մարտին թուրքերը յաջողած են գրաւել լեռնալանջը, կտրել անկենդան Մերոբի գլուխը և որպէս աւար՝ տանել իրենց հետ , իսկ գերի ձերբակալել Սօսէին և նետել Բաղէշի բանտը:

Ազատուելէն յետոյ, Սօսէն անցաւ Կովկաս, ապա՝ Պոլիս և վերջապէս

հաստատուեցաւ Եգիպտոսի Ալեքսանդրիա քաղաքին մէջ և 1952 թուականին վախճանուեցաւ: 1990-ական թուականներուն Սօսէի աճիւնը տեղափոխուեցաւ Եռաբլուրի հողին մէջ :

**Յ.Յ.Դ. Յ.Դ.Պ.Մ. քարոզչական
յանձնախումբ**

ԼՈՒՐԵՐ ԳԱՂՈՒԹՆԵՐԷՆ

**«Հայոց Ծեղասպանության 100-րդ Տարելիցը»
Արաբերեն Գիրքի Շնորհահանդեսը**



Հովանավորությամբ Իրաքի հայոց թեմի առաջնորդ Աւագ արք. Ասատուրեանի, կազմակերպությամբ Պաղտատի հայ երկսեռ երիտասարդաց միության եւ հսկողությամբ Հայոց ցեղասպանության 100-ամեակի ձեռնարկներու յանձնախումբին, համագործակցությամբ «Մասարա»-ի մշակոյթի եւ տեղեկատուական զարգացման հաստատության, 6 փետրուարին Պաղտատի հայ երկսեռ երիտասարդաց միության սրահին մէջ տեղի ունեցաւ «Հայոց ցեղասպանության 100-րդ տարելիցը»

արաբերեն գիրքին շնորհահանդեսը՝ ներկայությամբ գիրքի հեղինակներ Ալաա Շերիֆի եւ Ֆիքրէթ Պաղտատիի:

Կազմակերպիչ միութեան անունով Սարգիս Գոթունեան բարի գալուստ մաղթեց ներկաներուն, որմէ ետք Հայոց ցեղասպանության 100-ամեակի յանձնախումբին խօսքը ներկայացուց Մելքոն Մելքոնեան, իսկ յանձնախումբին իրականացուցած ձեռնարկներուն մասին անդրադարձաւ առաջնորդարանի ղիւանապետ Յակոբ Սահակեան:

Այնուհետեւ յաջորդաբար ելոյթներ ունեցան Իրաքի պետական, կրօնական, մշակութային, լրատուական հաստատութիւններու ղեկավարներ:

Յայտագիրի աւարտին, Աւագ արք. Աստուրեանի կողմէ գնահատագրեր բաշխուեցան գիրքի հեղինակներուն, «Ալ Մասարա» հաստատության, արուեստագէտ Անդրանիկ Օհաննէսեանին, հատորի սրբագրիչ Արա Աշճեանին:

Յայտնենք, որ ձեռնարկին զուգահեռ կ'ընթանար Անդրանիկ Օհաննէսեանի նկարչական գործերու ցուցահանդեսը՝ նուիրուած Հայոց ցեղասպանության 100-ամեակին:

**Համագգայինի Ալեքսանդրապոլի Մասնաճիւղը
Կը Հրատարակէ «Փարոս» Պարբերաթերթը**

Վերջերս Համագգային հայ կրթական եւ մշակութային միութեան Ալեքսանդրապոլսոյ (Յունաստան) «Արամ Խաչատուրեան» մասնաճիւղին նորակազմ վարչութիւնը, յունահայ համայնքին մէջ առաջին անգամ ըլլալով հրատարակեց մասնաճիւղի 4 էջնոց «Փարոս» շաբաթաթերթ-պարբերաթերթը:

Վարչութեան անդամներն են՝ Մարիամ Փերետսեան, Հրայր Տաղլեան, Գայեանէ Դաւիթեան, Սոֆիա Ամիրխանեան եւ Մարտուն Մամաճանեան:

www.aztagdaily.com

Համազգայինի «Զուարթնոց» Երգչախումբի Փառաշուք Համերգ

Կիրակի, 28 փետրուար 2016-ին Հալեպի «Գեորգ Եսայեան» սրահին մեջ տազնապահար հալեպահայութիւնը եզակի ոգեւորութիւն ապրեցաւ՝ ըմբռնելով Համազգայինի «Զուարթնոց» երգչախումբին բարձրորակ երգահանդէսը, գեղարուեստական ղեկավարութեամբ վաստակաւոր խմբավար Գայեանէ Սիմոնեան-Տէրեանի, դաշնամուրի ընկերակցութեամբ Ռուզան Պարսումեանի:

Երգահանդէսին բացումը կատարուեցաւ Սուրիոյ եւ Հայաստանի Հանրապետութեան քայլերգներով: Ապա ներկաները մէկ վայրկեան յտընկայս յարգեցին Սուրիոյ նահատակներուն յիշատակը:



Հայերէն բացման խօսքով Մարիա Պոշկեզենեան նշեց, որ Համազգայինը, հաւատարիմ իր առաքելութեան՝ տեւաբար կանգնեցաւ մեր ժողովուրդին կողքին՝ հայ մշակոյթով լիցքաւորելու անոր կեանքը:

Արաբերէն բացման խօսքով Բաֆֆի Սիւլահեան ըսաւ, որ փորձեցին ու կը շարունակեն փորձել մահուան դատապարտել Հալեպն ու անոր բնակչութիւնը, բայց Հալեպը կանգուն է իր ամրոցին նման, վկայ յ «Զուարթնոց» երգչախումբին յաղթական այս ելոյթը:

Այնուհետեւ երգչախումբը հանդէս եկաւ՝ ներկայացնելու ժողովրդային, հայրենասիրական եւ դասական երգերու գեղեցիկ փունջ մը:

Յայտագիրի առաջին բաժինով ներկայացուեցան հետեւեալ երգերը. «Հայր Մեր»՝ Եկմալեան, «Ազատ Հայաստան»՝ Ստեփան Լուսիկեան (նուիրուած Հայաստանի վերանկախացման 25-ամեակին), հարսանեկան երգերու շարք՝ Կոմիտասէն, «Տուն իմ հայրենի»՝ Ա. Իսպիրեան, հայրենասիրական երգերու շարք, մշակում՝ Գայեանէ Սիմոնեան-Տէրեանի, «Անուշ» օփերայէն «Վուշ վուշ», «Ամպի տակից», «Համբարձում եայլա» Ալ. Սպենդիարեան, մշակում՝ Գայեանէ Սիմոնեան-Տէրեանի, «Էնգելի» Ալ. Սպենդիարեան, մշակում՝ Գայեանէ Սիմոնեան-Տէրեանի (հնչինային այս երգին իր մասնակցութիւնը բերաւ Համազգայինի «Սարդարապատ» պարախումբը), «Ըրթ սոնկ»՝ Մ. Ճեքսըն, արաբերէն երգեր՝ «Ռէյթթէք պըլ աալի», «Ալ հաքքու սիլահի»:

Յայտագիրի երկրորդ բաժինի բոլոր երգերը մշակած էր խմբավար Գայեանէ Սիմոնեան-Տէրեանը:

Երգչախումբը այս բաժինով մեկնաբանեց հետեւեալ երգերը. «Է հէյ ոտքի»՝ Յ. Պատալեան, «Երնէկ, թէ այս նոր տարին»՝ Ռ. Հախվերդեան, « Քաղաք իմ Հալեպ» խօսք՝ Մարգարիտ Շամիլեան-Մուրատեանի, երժշտ. Գայեանէ Սիմոնեանի, «Հիլուա իա պելետի»՝ Տալիտա, «Ապարան»՝ Ռ. Պետրոսեան, «Անցնում ես նագով»՝ Ալ Աճեմեան, «Մոսկովեան գիշերներ»՝ Մ. Սետոյի, «Կապոյտ մանուշակ»՝ Մ. Մալիսաքալեան, «Արի, եար ջան», «Հոյնար» Թ. Ալթունեան, «Հայաստան»՝ Ա. Այվազեան:

Երկրորդ բաժինի կարգ մը երգերուն երգչախումբին ընկերակցեցաւ սենեկային նուագախումբը: Համերգի կարգ մը երգերուն գործիքաւորումը կատարած էր տոքթ. Բաֆֆի Ապեճեան:

ԱՅԼԱԶԱՆ

Վատ Գոյներ՝ Առողջութեան Համար



Գիտնականներու կարծիքով, տեսողական աշխարհարևակալման մէջ գոյնը շատ կարեւոր դեր կը խաղայ: Բժշկութեան, մասնաւորապէս՝ հոգեբանութեան մէջ, յաճախ կ'օգտագործեն գոյնի միջոցով դարմանումը:

Գունային ճիշդ երանգները շատ լաւ կ'ազդեն ջղային համակարգին վրայ, նոյնիսկ աւելի լաւ, քան՝ շատ մը դեղեր:

Վերջերս հետազոտութիւնները ցոյց տուած են, որ կարմիր-նարնջագոյն գոյնին երկար նայողներուն մօտ զարկերակը կ'արագանայ եւ

արեան ճնշումը կը բարձրանայ, որմէ ետք նոյն մարդիկը, երբ կը նային մութ կապոյտ երանգներուն, իրենք զիրենք շատ աւելի հանգիստ կը զգան:

Գիտնականները նաեւ ապացուցած են, որ այս կամ այն գոյնի բացակայութիւնը շատ գէշ կ'ազդէ մարդոց վրայ: Օրինակ՝ առողջ եւ ուրախ ապրելու համար կարեւոր են վատ գոյները: Այսպիսի գոյները մարդոց կու տան ստեղծագործական ուժ եւ կորով: Աշնան մարդիկ կը զգան «գունային պակաս», կանաչի բացակայութիւն... ընկճախտը, անքնութիւնը, քրոնիկ յոգնածութիւնը կրնան հետեւանք ըլլալ գոյներու պակասի:

Պէտք է իմանալ, որ՝

- Կարմիր գոյնը կը լաւացնէ մոտքին գոյնը եւ բուժիչ ազդեցութիւն կ'ունենայ կաթուածներու պարագային:
- Նարնջագոյնը երիտասարդացնող յատկութիւն ունի, կը լաւացնէ նիւթափոխականութիւնը եւ կը բարձրացնէ ախորժակը:
- Կանաչը դրական ազդեցութիւն կը գործէ գլխացաւի պարագային:
- Դեղինը կը կարգաւորէ ստամոքսին աշխատանքը:
- Կապոյտը կ'իջեցնէ արեան ճնշումը:
- Ճերմակը բուժիչ ազդեցութիւն կը գործէ ջղային համակարգին վրայ:
- Մանիշակագոյնը դրական ազդեցութիւն կը գործէ հոգեկան եւ ջղային հիւանդութիւններու պարագային: Զի անուշները կը բորբոսին, կը շաքարոտին, այլ խօսքով՝ կը փճանան:



www.aztarar.com

Մորթին Մեռած Բջիջները Մաքրող Ծեփուկ Մեղրով Եւ Նուշով Սքրապ

Մեռած բջիջները մաքրող ծեփուկը (սքրապ) պատրաստելու համար անհրաժեշտ են՝

5-6 հատ նուշ,
Կէս թէյի դգալ մեղր,
Քառորդ թէյի դգալ քրքում
(turmerie)



Ծեփուկը պատրաստելու համար նուշերը եռացած ջուրի մէջ դրէք, ապա կեղուեցէք եւ հարիչէ անցուցէք:

Մանրուած նուշին վրայ աւելցնել մեղրն ու փոշի քրքումը, խառնել եւ ստացուած ծեփուկը տարածել դէմքին եւ վիզին վրայ, սպասել 20-25 վայրկեան, ապա մատներուն ծայրով շրջանաձեւ մարձումներ ընել՝ մեռած բջիջները մաքրելու համար:

Հեղուկ կաթով մաքրել դէմքը:

5 Ուտելիք, Որոնք Միշտ Սառնարանը Պէտք Է Պահել

Արագ փճացող ուտելիքները պէտք է անպայման սառնարանը պահել: Ահաւասիկ՝ 5 ուտելիք, որոնք ըստ «Պիզնէս Ինսայտըր»-ի, պէտք չէ երկու ժամէն աւելի սենեակի ջերմաստիճանով պահել:



1.- Կաթը պէտք է սառնարանը պահել՝ վնասակար մանրէներու զարգացումը կանխելու համար:



2.- Թարմ միսը եւ ձուկը նոյնպէս սառնարանը պէտք է պահել եւ մնացեալ ուտելիքներէն հեռու՝ զոց ամաններու կամ կերպընկալէ տոպրակներու մէջ:





3.- Հալկիթը նոյնպէս պէտք է սառնարանը պահել՝ սալմոնէլա մանրէէն չվարակուելու համար:

4.- Կակուղ պանիրները մշտապէս սառնարանը պէտք է պահել. այդ պանիրներէն յիշենք՝ ռոքֆորը, փարմըզանը եւ այլն...

5.- Անուշներու շիշերը անգամ մը որ բացուին, պէտք է որ անմիջապէս սառնարանը դրուին, այլապէս մէջի անուշները կը բորբոսին, կը շաքարոտին, այլ խօսքով՝ կը փճանան:

Սիրելի քուէյթահայեր, կրնաք ապահովել ձեր տոմսերը Ազգային Առաջնորդարանի քարտուղարութեան գրասենեակէն:

ՎԻՃԱԿԱՀԱՆՈՒԹԻՒՆ		ՎԻՃԱԿԱՀԱՆՈՒԹԻՒՆ	
ԱՆՈՒՆ: -----		Վագմակերպութեամբ՝ Քուէյթի Ազգային Վարչութեան	
ՄԱԿԱՆՈՒՆ: -----		ՆՈՒԷՐ՝	
ՀԵՈ: -----		Հայաստանի «Եռանակ» ՄՊՀ շինարարական ընկերութեան կողմէ մէկ ԲՆԱԿԱՐԱՆՆԻ նուիրում Յէկէդեցոյ Հիմնադրամին: Ընդհանուր մակերես՝ 54.10 m ²	
Թիւ:		Վիճակագրութիւնը տեղի պիտի ունենայ Ուրբաթ, 27 Մայիս 2016-ին, Սրբոց Վարդանանց եկեղեցոյ շրջափակէն ներս:	
	Թիւ:	Մակ՝ 25 ՔՏ	

			«ԵՌԱՆԱԿ» ՍՊԸ "YERANAV" LLC
Դաւիթաշեն			
4րդ թաղամաս 45/5			
Երևան			
		ՀԱՍՏԱՎՈՐՈՒ ԵՎ ՆՈՒՐԱԿԱՆՈՒՄ 54.10 m ²	



Մեծ ուրախութեամբ կը տեղեկացնենք, թէ Քուէյթի Սիջ-եկէդեցիներու Ֆութպոլի մրցաշարքը կը շարունակուի: Հինգշաբթի, 3 Մարտ 2016ին, «Արարատ Բ.» կրտսերներու խումբը ապահովեց 5-0 փայլուն յաղթանակ մը՝ ընդէմ Յոյն Կաթողիկէ համայնքի մարզիկներուն:

Յիշենք նաեւ, Շաբաթ, 28 Փետրուարին Համայնքիս ասագ խումբը 2-0 արդիւնքով յաղթեց Յոյն Ուղղափառ համայնքի խումբին:

Յաջողութիւն կը մաղթենք մեր մարզիկներուն:

ՅԱՅՏԱՐԱՐՈՒԹԻՒՆ

Դասընթացը

Կազմակերպութեամբ՝
ՀՕՄ-ՔՄՄ-ի վարչութեան

ՀՕՄ-ՔՄՄ-ի վարչութիւնը մեր սիրելի տիկիններուն
եւ օրիորդներուն ձեռարուեստը զարգացնելու
համար կազմակերպած է

«Վան»-ի ասեղնագործի դասընթացը



Շտապեցէք եւ արձանագրեցէք ձեր անունները
օգտուելով այս առիթէն:

Արձանագրութեան սակն է 20 Բ.Տ. եւ կը պարունակէ
աշխատանքի բոլոր իրերը:

Դասընթացը պիտի սկսի 14 Մարտ, 2016- ին, ժամը
9:30-ին եկեղեցոյ Արագած սրահէն ներս:

Յաւելեալ տեղեկութիւններու եւ արձանագրութեան
համար դիմել հետեւեալ ընկերուիներուն.

Ընկհ.Մակի Թադոյեան-----66172300

Ընկհ. Սիւզան Քեօշկերեան-----66607512